



SAMPAH sarap berselerak di hadapan sebuah kafe siber di sekitar Jalan SS 21/39, Damansara Utama.



GUMPALAN karpet yang terbiar di kawasan Jalan SS 21/1A, Damansara Uptown, Petaling Jaya.

Kosmo

15/07/2010 M/S 34

Kita belum berubah!

Masih ramai yang tidak berasa bersalah menjadikan longkang dan kaki lima sebagai tempat melonggokkan sampah.



SEDIKIT-sedikit, lama-lama jadi bukit. Biasanya peribahasa ini dikaitkan dengan tabiat menabung atau usaha yang membawa manfaat. Namun, di Malaysia, tidak keterlaluan jika peribahasa ini juga bertepatan dengan satu tabiat buruk orang Malaysia.

Sama ada di bahu jalan, lorong pejalan kaki mahupun di sebalik tembok bangunan komersial, sampah sarap tidak dibuang dan diurus dengan baik. Ia seolah-olah menjadi satu pemandangan biasa dan tidak

dianggap sebagai isu jangka, baik dari segi moral, sosial mahupun budaya.

Bekas-bekas polistirena, botol minuman keras, kotak-kotak minuman, barangan terpakai dan beg-beg plastik dibuang merata-rata. Ada yang dengan selambanya menjadikan longkang-longkang di tepi deretan kedai rumah sebagai lokasi 'ideal' untuk melonggokkan sampah.

Lensa Urban minggu ini merakamkan senario memalukan tersebut di deretan kedai di Desa Setapak, Kuala Lumpur.

Di sekitar kawasan perniagaan Damansara Uptown, Petaling Jaya, sampah sarap boleh dilihat mencemari ruang koridor kedai mahupun premis yang sedang diubah suai.

Sungguhpun tidak terdiri daripada bahan-bahan sampah basah yang meninggalkan bau kurang menyenangkan, keadaan beg-beg plastik yang berselerak sudah cukup menyakitkan pandangan.

Tidak cukup dengan itu, di satu sudut lain, longgokan material terbuang hasil ubah suai juga dibiarkan di atas lantai. Inisiatif pihak syarikat pemaju atau pengubah suai bangunan itu mungkin dalam perancangan, tetapi sementara menunggu hari pelaksanaannya, amaun timbunan tersebut pasti bertambah.


Itu belum lagi mengambil kira golongan tertentu yang mengambil kesempatan menjadikan lokasi tersebut sebagai tempat pelupusan sampah.

Bukankah lebih baik jika timbunan bahan buangan kontraktor bangunan itu dialihkan atau dibuang agar lokasi tersebut selamat untuk golongan pejalan kaki?

Sekiranya masyarakat kita tidak tahu rasa bertanggungjawab terhadap kebersihan persekitaran mereka sendiri, pihak berkuasa tempatan seharusnya bertindak lebih tegas bagi mengatasinya.

Kempen kesedaran berterusan, hukuman yang menginsafkan dan penyediaan sistem pemantauan serta pengurusan sampah yang lebih cekap - tiga cadangan ini perlu bergerak seiring. -**YEO LI SHIAN**

lensa urban



KEADAAN sampah sarap di longkang tepi sebuah deretan kedai di Desa Setapak, Kuala Lumpur.



KEPINGAN-KEPINGAN papan yang dibiarkan di atas lantai sebuah premis di Jalan SS 21/1A, Damansara Uptown.



BEKAS polistirena, kotak rokok dan botol minuman keras memenuhkan sebatang longkang di Desa Setapak, Kuala Lumpur.